



Fidoyilik —  
Vatanga xizmat demak!

2024-yil 8-fevral, payshanba,  
16 (23.893)-son

**KUN  
HIKMATI**

Dunyoda  
oltindan  
boshqa ham  
zanglamaydigan  
narsalar bor

1913-yil aprel oyidan chiqa boshlagan



www.zarnews.uz https://www.facebook.com/zarnews.uz @zarnews\_uz https://www.zarnews.uz

## Kuchli kengash, hisobdor va tashabbuskor hokim

Shu yilning 2-fevral kuni O'zbekiston Respublikasi Prezidentining "Mahalliy davlat hokimiyati vakillik organlarining faoliyati samaradorligini yanada oshirish chora-tadbirlari to'g'risida"gi farmoni qabul qilindi

Farmon bilan O'zbekiston mahalliy boshqaruvi tarixida birinchi marotaba mahalliy davlat hokimiyati organlari faoliyatini yangi model — "Kuchli Kengash, hisobdor va tashabbuskor hokim" tamoyili asosida **isloh qilishga qaratilgan qator qoidalar** belgilab berildi.

**Birinchidan**, jamiyat va davlat hayotining muhim masalalarini hal etishda ushbu hududda istiqomat qilayotgan aholining fikrini inobatga olish, mahalliy davlat hokimiyati vakillik organlarining rolini oshirish maqsadida ta'lim, atrof-muhitni muhofaza qilish, shaharsozlik, transport va hududning infratuzilmasini rivojlantirishga qaratilgan 33 ta vakolat Kengashlar ixtiyoriga o'tkazilmoqda. Jumladan:

**1) Ta'lim sohasida:** tegishli hududda davlat bog'cha va maktablarini tashkil etish bo'yicha qaror aynan mahalliy Kengashlar tomonidan qabul qilinadi. Endilikda, hududdagi ehtiyojni har tomonlama o'rgangan holda, qaysi hududda, mahallada yangi maktab yoki bog'cha tashkil etish kerak, qaysi birini kengaytirish, qaysisini tugatish kerakligini aholi irodasining ko'zgu bo'lmish xalq vakillari hal etadi.

(Davomi 2-sahifada) >>>

9-fevral — Alisher Navoiy  
tavallud topgan kun

**Alisher Navoiyni mutafakkir shoir sifatida bilamiz. Mutafakkir so'zining ma'nosi yuksak tafakkur sohibi, keng va chuqur falsafiy mushohada yuritish qobiliyatiga ega kishi demakdir. Navoiy qoldirgan merosni hikmat marjonlari to'la dengizga o'xshatish mumkin. Quyida mutafakkir shoirning ana shunday hikmatlaridan o'qiysiz.**



Kishikim qilsa olimlarga ta'zim,  
Andoqki qilur Payg'ambarga ta'zim.

Ilm o'qub qilmagan amal maqbul, dona sochib  
ko'tarmadi mahsul.

Bilmaganni so'rab o'rgangan olim, orlanib so'ramagan  
o'ziga zolim.

Befoyda so'zni ko'p aytma, foydali so'zni ko'p  
eshiturdin qaytma.

Til shirinligi ko'ngilga yoqimlidir; muloyimligi esa  
foydali. Chuchuk til achchiqqa aylansa, ko'pchilikka  
zarari tegadi; qanddan may tayyorlansa, harom bo'la-  
di. Shirin so'z sof ko'ngillar uchun asal kabi totlidir;  
bolalar uchun muloyim tabiatli odam halvofurush kabi  
sevimidir.

U yerdan bu yerga gap tashuvchilar elning gunohini  
o'z bo'yniga oluvchilardir. Chaqimchilik hatto chin  
gap bo'lsa ham, ko'ngilsizdir, yolg'on bo'lsa, yanada  
nafratlidir. So'z yetkazuvchining xoh kattasi, xoh kichigi  
— do'zax o'tining tutantirig'i bil.

Kimki, yolg'on so'zni birovga to'nkagay, o'z qora  
yuzini yoqqa bulaydi. Ozgina yolg'on ham ulug'  
gunohdir; ozgina zahar ham halok qiluvchidir.



## SAMARQAND va GRODNO

HAMKORLIGI MADANIY ALOQALARDAN BOSHLANADI

Belarus Respublikasining Grodno viloyati gubernatori Vladimir Karanik boshchiligidagi delegatsiya 6 fevral kuni Samarqandda bo'ldi. Viloyat hokimi Erkinjon Turdimov bilan o'tkazilgan uchrashuvda tomonlar o'zaro hamkorlik aloqalarini yo'lga qo'yish va rivojlantirish istiqbollari muhokama qildilar.

Erkinjon Turdimov O'zbekiston va Belarus Respublikasi o'rtasidagi hamkorlik mustahkam asosga ega ekanligini ta'kidlagan holda o'zaro manfaatli aloqalarini rivojlantirish yo'nalishlariga e'tibor qarattirdi. Jumladan, ayni paytda Belarus tibbiyoti jahonda yuqori sur'atda rivojlanib borayotgani qayd etildi. Ayniqsa, ona va bola salomatligini muhofaza qilish borasidagi natijalar bu mamlakat tibbiyotining rivojlanish tendensiyalarini o'rganishni taqozo qiladi. Shu munosabat bilan tibbiyot sohasida mutaxassislar almashinuvini yo'lga qo'yish, hamkorlikda ta'lim dasturlarini amalga oshirish zarurligi ta'kidlandi.

Shuningdek, uchrashuvda axborot texnologiyalari, ilm-fan, madaniyat va turizm sohasidagi hamkorlikni yo'lga qo'yish bo'yicha takliflar o'rta qo'yildi. Hamkorlikni mustahkamlash uchun, avvalo, madaniy aloqalar rivojlanishini ta'kidlagan E. Turdimov ikki mintaqada shaharlari o'rtasida birodarlik aloqalarini yo'lga qo'yish, Samarqandda Grodno shahri kunlarini, Grodnodan Samarqand kunlarini o'tkazish taklifini bildirdi.

Vladimir Karanik samimiy qabul uchun Erkinjon Turdimovga minnatdorlik bildirib, O'zbekis-

ton va Belarus o'rtasidagi mustahkam hamkorlik aloqalarining hududlar miqyosida rivojlantirilishi har ikki tomon uchun ham manfaatli bo'lishini ta'kidladi. Tibbiyot sohasida mutaxassislar, talabalar tajriba almashinuvini yo'lga qo'yish hamkorlikni yo'lga qo'yish borasidagi taklifni qo'llab-quvvatlashini bildirib, qishloq xo'jaligi sohasida ilmiy va texnikaviy hamkorlikni amalga oshirish borasida ulkan imkoniyatlar mavjudligini qayd etdi. Xususan, gubernator qishloq xo'jaligi texnikalari, mahsulotlarni qayta ishlash texnologiyalari bo'yicha ham samarali loyihalarni amalga oshirish imkoniyatlariga ta'kidladi. Shuningdek, Grodno shahrida maishiy chiqindilarni qayta ishlash sohasida amaliyotga tatbiq etilgan tizim Samarqand uchun ham manfaatli bo'lishini bildirib, bu borada hamkorlikda istiqbolli loyihalarni amalga oshirish mumkinligini ta'kidladi.

Uchrashuv yakunida ikki hudud o'rtasidagi hamkorlik aloqalarini rivojlantirish borasida aniq chora-tadbirlarni belgilash lozimligi qayd etildi.

Tashrif davomida Grodno viloyati gubernatori Vladimir Karanik boshchiligidagi delegatsiya Samarqand shahrining diqqatga sazovor joylari bilan yaqindan tanishdi.

7-fevral kuni Toshkent shahrida O'zbekiston va Belarus hududlarining ikkinchi forumi bo'lib o'tdi. Unda viloyat hokimi Erkinjon Turdimov ishtirok etdi.

Forumda E. Turdimov viloyatimizda ikki davlat hududlari o'rtasida sanoat, transport, qishloq xo'jaligi va iqtisodiyotning boshqa tarmoqlarida qo'shma loyihalarni amalga oshirish uchun qulay sharoit yaratilganligini ta'kidladi. Bu borada Samarqandda Grodno viloyati gubernatori Vladimir Karanik bilan viloyatlar o'rtasida ikki tomonlama hamkorlik masalalari atroflicha muhokama qilinganini e'tirof etdi.

Samarqand viloyati yer osti boyliklari tabiiy resurslari - oltin, volfram, granit, marmar va boshqa foydali qazilmalarga boyligi, yangi texnologiyalarni

joriy etish, yuqori mahsulodlikka erishish, maksimal foyda olish uchun barcha zarur shart-sharoitlar yaratilganligi bilan alohida ahamiyatga ega hudud, - dedi E. Turdimov. - Shu munosabat bilan iqtisodiy hamkorlikning bir qator istiqbolli yo'nalishlarini aytib o'tmoqchiman.

**Birinchidan**, Samarqandda qishloq xo'jaligi mahsulotlarini chuqur qayta ishlash va chorvachilikni rivojlantirish bo'yicha loyihalarni amalga oshirish uchun imkoniyatlar mavjud.

**Ikkinchidan**, viloyat farmatsevtika sanoatini rivojlantirish uchun yetarli sharoitga ega.

**Uchinchidan**, bugungi kunda eng ilg'or yo'nalishlardan biri bo'lgan IT texnologiyalari sohasida ehtiyoj, shu bilan birga zarur imkoniyatlar bor. Masalan, viloyatimiz aholisining 60 foizini yoshlar tashkil etishini hisobga olsak, yiliga 15 mingdan ortiq IT mutaxassislarini tayyorlash mumkin. IT korxonalarini faoliyat uchun qo'shimcha shart-sharoitlar yaratish maqsadida Samarqand shahri markazidan eng kam ijara to'lovi bilan barcha sharoitlarga ega bino ajratilgan.

Bugun hududlarimiz o'rtasidagi hamkorlikni rivojlantirish bo'yicha imzolangan «Yo'l xaritasi» Samarqand va Grodno viloyatlari o'rtasidagi o'zaro hamkorlikni yanada chuqurlashtirishga xizmat qiladi.

## Oqdaryoda "Inson" ish boshladi

Tumanda "Inson" ijtimoiy xizmatlar markazi binosi foydalanishga topshirildi.

Shu munosabat bilan o'tkazilgan tadbirda tuman hokimi Sh. Qudratov ishtirok etib, har bir tuman va shaharda yo'lga qo'yilayotgan professional ijtimoiy himoya tizimining ahamiyati, sohada amalga oshirilayotgan islohotlar haqida ta'kidladi. Tumanning ijtimoiy himoyaga muhtoj fuqarolari uchun yaratilayotgan imkoniyatlar haqida ma'lumot berildi.



## "TABIAT CHEGARA BILMAYDI"

(Nature Knows No Borders)

2024-yil 12-17-fevral kunlari Samarqandda shu shior ostida yovvoyi hayvonlarning ko'chib yuruvchi turlarini asrash konvensiyasi ishtirokchilari konferensiyasining 14-yig'ilishi (CMS COP14) bo'lib o'tadi.

Biz insoniyat ko'plab ekologik muammolar — iqlim o'zgarishi, suv resurslari tanqisligi, atrof-muhitning falokatli ifloslanishi, bioxilma-xillikning kamayishi va boshqa muammolarga duch kelgan zamonda yashayapmiz. Bu global muammolar tabiat va inson madaniyatining to'qnashuvi natijasida kelib chiqmoqda.

O'zbekiston biologik xilma-xilligi 27 mingdan ortiq turni (14900 tur umurtqasizlar, 715 tur umurtqalilar, 107 tur sut emizuvchilar, 467 tur qushlar, 61 tur sudralib yuruvchilar, 3 tur amfibiyalar, 77 tur baliqlar, 11 ming tur o'simliklar, zamburug'lar, suvo'tlar, 8 foiz endemik turlar hisoblangan 4300 tur yuksak yovvoyi holda o'suvchi o'simliklarni) o'z ichiga oladi. O'zbekiston Respublikasi Qizil kitobiga (2019)



206 hayvon va 314 o'simlik turi kiritilgan.

Bugungi kunda yurtimizda 7 ta qo'riqxonada, 3 ta milliy tabiat bog'i, 10 ta tabiat yodgorliklari, 12 ta buyurtmaxona va boshqalar faoliyat yuritadi. Ramsar konvensiyasi doirasida yangi tabiiy hududlarning xalqaro suv-botqoq yerlar ro'yxatiga kiritilganligi, mamlakatning 51 ta muhim ornitologik hududlarida inventarizatsiya va tavsiflash ishlari amalga oshirilganligini alohida ta'kidlash kerak.

Biologik xilma-xillikni saqlash bo'yicha birinchi Milliy strategiya va harakatlar rejasi O'zbekistonda hukumat qarori bilan 1998-yilda tasdiqlangan. Bu o'sha paytdayoq

tegishli xalqaro tuzilmalar bilan hamkorlikni yo'lga qo'yish va mahalliy flora va faunani muhofaza qilish sohasidagi loyihalarni amalga oshirishda ko'mak olish imkonini berdi.

Xususan, mamlakatimiz Global ekologik fond (GEF), Jahon banki, Birlashgan Millatlar Tashkilotining Taraqqiyot Dasturi (BMTD), BMTning atrof-muhit dasturi, UNESCO, Butunjahon yovvoyi tabiatni muhofaza qilish jamg'armasi, Mixail Zukkovning tabiatni muhofaza qilish jamg'armasi va boshqa xalqaro tashkilotlar bilan hamkorlik qiladi.

(Davomi 3-sahifada) >>>





